

憺園文集

憺園文集卷第二

詩

虞浦集

上

感遇

四首

青陽及元冥四節相終始當春發衆葩歲週復似
此人生非日月盈沖無定理幽鳥鳴空林芳蘭生
澗底感茲枯苑情慨慷不能止齊物遊天倪吾思
蒙莊子

驚風扶車輪吹我至帝畿帝畿雲五色鬱鬱羅朝
暉鳴騶下雙闕珥貂來紫微寫懷固不易知己良
亦希高談傾四座錯落如珠璣兔絲難禦寒燕麥

寧療饑投翰長太息命駕言旋歸

衛青方少賤井底同黽蛙牧羊旣失利給使平陽家但求免笞罵封侯骨徒誇一朝仗劍起顧盼生光華遂尚平陽主同坐歲難車昔時爲奴僕變化今龍蛇貴賤反掌間世人休咄嗟

大婦梳蟬鬢小婦描蛾眉大婦飭豐膳小婦織機絲豐膳嘗弗旨織成服乃宜愛則有餘妍憎乃生百嫌愛憎無常理妍媸靡定姿瀉水置甌中涇渭誰能知

鸞鳥息蘭池羽毛衆所羨一朝入雲羅不及翔風
燕騏驥困服箱亦同驚馬賤滅景權竒姿棧豆誰
能戀吾慕運期子慷慨辭親串徒步東出關五噫
存諷諫帝京高峨峨懷寶羞自衒逍遙齊魯隅古
人苦不見時邁愍芳香行歌淚如霰

少年張勁弩仰天射黃鶴黃鶴衝層霄纖禽應絃
落漢季盛豺虎曹公殄群雄吐哺招賢豪指顧清
寰中當時管幼安避亂居遼東掉頭謝濁世寶道
愛吾躬龍德固一致潛見理不同苟陳諸名士跼
蹐安所終

優孟學叔敖楚王不復疑以爲亂其真中藏誰能
知高坐談仁義挾詐空爾爲漢相覆布被內顧多
所私貂蟬列鼎饌故人寧見欺矯矯平津侯徒令
後世嗤

小人曲似鈎君子直如弦曲直豈難辨世俗多紛
然盜蹠或稱善夷惠乃未賢行行羊腸坂車馬爲
迤邐邈矣司馬徽明哲善自全

白璧酬連城忽沈雒水湄璧沈不再出有時還見
之客子辭故鄉分手各東西東極扶桑島西行邛
笮溪邂逅遇中原相見了不迷獨有三良殲黃鳥

聲慘淒

田蚡爲諸郎竇嬰方貴日侍酒大將軍跪起如子
姪一朝踞要津往來故親暱衰盛勢無端榮瘁理
難一賓客相猜疑杯酒成禍基東朝辨不屈蜚語
中魏其依倚椒房戚磐石永不移渭城方棄市武
安隨病死快意能幾何傾軔無全理勢利相烹煎
浩浩靡終始天道如張弓謙亨信君子

曹氏盛賓客文章傳鄴都插貂佩華紱曉入承明
廬日暮遊西園聯翩隨後車鋪揚主人德言辭多
囁嚅覽彼公讌詩慨焉增歎歔饑烏傍簷隙安得

志意舒

巨魚揚鬣鬣鼠漁父舉網隨翡翠耀羽光服美身以
危李斯方說秦陸機初入洛咳唾風雲生冠帶相
追索一言重邱山須臾在鼎鑊榮華曾幾時迅風
捲長薄所以賢達流進止貴權度採擷莫盈筐汲
泉莫多酌苟能齊物化安事西山藥

滁陽覽古

三首

城外高臺起大風當年聖主此臨戎中原逐鹿由
陳涉四海從龍始李通陵寢能罷蟠泗上山河襟
帶接江東即今王氣成消歇猶說開天首郡雄

環滁人說古循良太守風流此地長千載衣冠存
畏壘數枝香雪是甘棠亭邊乳燕當簷語潭底神
龍向晚藏日暖騎驢尋踏遍殘碑歷歷識歐陽
太僕旌旄使節尊先朝名馬似雲屯于今上殿龍
媒盡惟有荒祠鸛垤存千里蕭條吹鐵笛百年寂
寞狩金根奚官白首空長嘆銅雀晨鳥未報恩

感遇

汲水辨澗溜染絲鑒黑白古人傾蓋間結交慎所
擇寸心苟相投軀命非所惜寶劍解贈君出入耀
光澤分手去路衢萬里無間隔結歡不須多樽杳

亦何益寧聞管鮑家堂有珠履客

讀史 一首

安期號僊人挾策干項羽王生隱者流解襪行蹠
蹠其謀秘弗傳深藏若良賈齊人魯仲連高情邁
千古史傳載其辭乃爲說客祖故皆賢達人寧與
儕輩伍

漢高定天下析圭及微功蕭曹旣上賞雍齒亦得
封兩賢不相厄何爲斬丁公人臣無二君綱維古
今同獨有射陽侯無以謝重瞳

郊城行

行行渡黃河晨發鍾吾驛前驅近郟城四顧何岑
崒驚風吹黃沙人馬互衝突健兒晝掠人倏忽馳
沙磧雪刃耀日光彎弓射鳴鏑同行四五輩聞此
心踟躕行告郟城宰脩途殊孔棘蒙山至歷城一
望沙草白知君素訓練帳下多驍卒安得選數騎
相送濔沱北君聞便慨然謂是守土職此地二十
年黃巾禍不息煙火萬餘家遭亂久蕩析我來今
五載戶口漸招輯陵羽兩三間爲患在肘掖自我
蒞官後群盜稍斂跡往往聚峒嵒地屬宿遷邑宿
遷近百里鄰封亦分責我有蒼頭奴驍勇一當百

亟遣衛諸君長驅至燕域語畢趣登堂指麾騎士
集就中得四人一斥赤幘駿馬雁門種鞍轡新
粧飾雕弓繫綠韉寶刀耀光澤恃此可無恐各各
壯顏色君意更殷勤送自東門出君固關東豪事
事皆精密嗟我學雕蟲窮年事不律彈鋏走四方
慷慨填胸臆淒涼古徐州衰颯顓臾國漸近泰安
道猶聞婆婦泣茫茫天地間樂土烏可得良由亂
離來守令無譬畫安得如君等參錯爲邦伯一歌
郟城行輾轉心憂惻

偶作

春繁更秋落榮枯各異辰造化本如此豈敢辭賤
貧嗟哉膏梁客文繡車重茵榮華若朝露松檜照
夜燐

都下贈彭雲客

四首

極目長楊五柞宮賦成猶自老英雄風塵何處逢
唐舉遊說終難學崩通白髮老親愁客騎紅顏小
婦盼歸鴻丈夫應有遭逢日莫便悲歌易水風
當年同客淮陰道暮雨秋風黃石祠千載論交懷
貢禹一時任俠讓袁絲觀碑太學君先至渡馬桑
乾我已遲相見不禁思往事圯橋流水兩心期

天涯此日得相親話到深更酒數巡獨有半墨悲
謝傳嬾從鄒倩過平津樓臺是處聞笳鼓富貴何
心奏鬱輪且向盧龍尋舊約當壚十五正芳辰

高樓擊筑慰離羣莫把終南石硯焚五月披裘猶
混跡十年作賦欲凌雲城邊沙草張華宅驛畔楊
花樂毅墳休爲故園增慨念薊門春色本無分

永平推官尤展成有事河間道經都門喜

晤二首

憶君遠道路漫漫相見蕭齋春色寒山海流離今
日聚邊城烽火近時安地當孤竹風蕭瑟塞繞盧

龍勢鬱盤明旦都亭分手去殷勤朋好勸加餐
星軺屈指泝滹沱却向昭王臺下過射虎夜深迷
碣石觀魚春蚤度灤河一官萬里鱗鴻少二月三
山霜草多自是才人多治績已看遼海不揚波

客燕作

橘柚植玄朔華藕移高岑託根信失所感物增悲
心北土非吾鄉何爲久滯淫望望東西隅吳會邈
難尋歲晏猶絺綌庭牖涼風侵迴飈狂以厲朱光
忽西沈中野何蕭條萬里生層陰離鴻增哀號塞
馬發悲音踈踏安所極泣下沾衣襟

望遠曲和陸麗京

十首

憶年十四學箏篴初畫青螺逐伴遊一自玉釵分
紫塞空餘寶瑟置紅樓幾年霜雪還如舊萬里關
山共此愁長日強邀看鬬草驚沙颯颯不勝秋
樓頭春色易蹉跎暗剪蘭膏賦短歌夫壻縱難偕
嬾婉孤身已自託絲蘿原知歡聚生前少得沐恩
情夢裏多何處便排靈鵲度銀蟾中夜耿明河
紅脂重整暗消魂舊日粧奩不復存繡罷鴛鴦思
故侶翦成蛺蝶送新嬌月明獨把琵琶訴春到愁
聞鳥鵲喧慚媿當年銅爵妓遙憑總帳答深恩

春日輕粧到柳塘芳郊士女踏青忙亦多金屋名家子間有青樓薄命倡幾處鞦韆依畫閣何人窈窕守空房開元頭白宮人在尚逐今時歌舞場屈指經年夜獨眠畫圖還未到君前自憐弱歲羞歌舞不是秋風浪棄捐燈照空閨愁緩箭風吹寒幌撥哀絃嬾看小小鄰家婦日煖長堤跨錦韉銅龍水滴漏偏遲不盡歡娛往事思姊妹同纏五日線十三初學四言詩願爲黃鵠雙飛樂豈識青陵千古悲織就迴文難寄遠天涯蕩子那由知生小蛾眉學內家鏡臺觸目自咨嗟舞衣疊疊從

新製繡被重重別樣花古堞悲風吹簞簟晚山明
月送琵琶葉砧消息聞無恙祇恐難隨萬里槎
日高斜卧捲流蘇側耳徒勞聽鷓鴣恰似參辰乖
絕域恨無羽翼送微軀盤中蘇氏詞難續陌上羅
敷志不渝底怕少年輕調笑逢人先避霍家奴
雲中一去絕書郵蕭瑟空庭正蚤秋聞說從軍因
社稷那堪促柱擅風流偶隨大婦臨青鏡聊與姑
嬋慰白頭迢遞牽牛何處是年年花落曝衣樓
迴看蟬鬢淚如波渺渺思君可奈何試向春風窺
燕子難將心事語鸚哥明知白玉原無玷只恐朱

顏卻易過若到平陽公主宅踟躕未忍試新歌

有感和計甫草

莫說承恩羨尹邢入宮幾見久娉婷延年女弟歸
黃土鈎弋夫人下掖庭縱有吳脂并越粉空陳甲
帳與雲屏從來薄命都相似夜夜烏啼不忍聽

懷都門同學諸子

曩與二三子拊翼同廻翔高談浩縱橫豁達露中
腸尚懼蕭朱輩歡愛難久長永言誓磐石千載期
弗忘並轡渡河陰連軫矚太行帝京盛芳菲促坐
陳羽觴割鮮進嘉饌撥絃揚清商本圖偕嫵婉攜

手相徜徉不悟卒別離翻飛各一方諸子策名日
容華耀朝陽辟若黃鵠羽一舉凌扶桑伊予侔斤
鷄終然蓬蒿藏華纓坐魏闕緼袍處窮鄉所思非
隱約念舊增感傷窮達既異理會合豈有常相勗
在令名勉旃日月傍

舟行即事

三首

去鄉方百里風景似天涯防雨爭收麥貪晴各種
瓜宿雲埋古塔深樹護人家空嘆居游異風塵老
歲華

野店蕭疎極裕衣增暮寒潮生漁網集磯靜客舟

安碧鮮侵荒寺滄江隱釣灘遺民追往事說罷涕
洟瀾

返照深林裏輕航載一尊石榴開廢圃野槿綴荒
邨雨漲橋平水人間雀啁門冥心聽萬籟寂寞已
黃昏

得計甫草書

聞君遊薊北何事滯淮東匹馬經梁宋荒城過沛
豐棄繻今日事贈縞古人風是處知名姓休嗟客
路窮

贈姜軼簡

作客同千里相逢下澤車
廉頗猶未老劇孟本無家
障塞談兵略江湖感歲華
夜觀牛斗象莫便泛星槎

子房

子房未遇圯上老千金結客尚年少
東遊求見倉海君託身俠士圖報秦
陽武城南白日黑鐵椎擊碎祖龍魄
秦人方上封禪書鮑魚臭亂輶輶車

寄吳錦雯

單車過大庾急舸下涇陽
地遠交遊少官閒嘯咏長
山禽巢翡翠庭樹蔭枕榔
吳隱清風在千秋意

莫忘

寄陳皇士太僕

輶軻宇宙間晚晚非年少終歲守一編行藏詎及

料君志比劉琨余才遜溫嶠

史云嶠母之妹為琨妻太僕夫人余從母也

越石

百鍊剛義與星辰照太真社稷臣勩力圖帝造兩
人志意孚萃聚一何巧今昔旣異時顯晦非一道
壯心久淹沒固窮亦高操濯足東海濱與爾行垂
釣

憂旱

去年大水舞商羊澤國波濤憂稻梁今歲閭閻鬱

相望雲漢爲災旱魃狂官吏拜禱零壇旁絳霄道
士披霓裳桐魚石燕不致祥家家汲水祠龍王插
旗擊鼓居民忙農夫行役心悲傷縣令督租還如
常

風帆

秋盡猶行役風帆動水漪山雲看易盡岬州去還
隨朝揖要離墓晚尋季札碑檣烏啼不歇游子益
增悲

昭君曲

豈是君恩薄惟緣誤畫圖何心留毛毳幕有夢到金

鋪簞策邊風急琵琶漢月孤單于初罷獵含淚侍
耀瑜

絕句 三首

下直高軒指玉繩尚方宣賜酒如澠閒憑碁局爲
吳語雅量人思王茂弘

公子長楊校獵來鳴鞭挾彈勢喧逐至尊近日渾
無事夜夜期門讌飲回

坐中誰擅碧雞談玄夜飛霜撫劍鐔酒半忽看鸛
鵲舞舊人惟有老何戡

薛仔鉉安期招同孫嘉客陳曉江龍龔在田

韓公年楊豐玉飲讀書堂即席賦呈諸子
今日良宴會歡樂難具陳坐中盡是曹劉輩西園
車蓋如雲屯張筵縱飲已及夕主人投轄留賓客
羽觴角觶郎官廚蘭陵美酒浮琥珀清歌妙舞雜
座隅明月高高照綺席諸君意氣干雲霄傾蓋相
逢盡相識子荆新自陟陽回征西官屬共徘徊元
龍結客湖海士壯遊感嘆黃金臺龔生墳典一何
富韓嬰詩傳誠多材揚子草玄方閉戶執戟何心
新室組薛家兄弟最能文二陸三張不足數獨余
拓落已有年解嘲客難亦何補客裏徒悲彈蒯緱

坐中空自題鸚鵡驅車梁楚至幽燕帝闕經過意
惘然酒泉張掖漸開境牂牁越舊多烽煙長楊出
獵觀如堵騎射良家來右輔輜車幾部出漁陽刀
幣頻年輸少府魏其武安徒紛紜灌夫藉福還自
詡狂生慷慨獨歸來黑貂裘敝朔風哀趙勝造門
枉好客孫弘開閤詎憐才天涯行盡無知己今日
襟懷爲爾開丈夫立身各有志寧甘市井逐塵埃
酒闌起舞從此別但見高臺月落西山隈

發潞河留別繆歌起

雙鳥比翼飛一鳥東南翔子當留京邑我獨歸故

三百廿
鄉誼日戒行李晨起踐嚴霜置酒臨交衢驚馬立
徬徨悠悠三千里驛路阻且長人生如皎月弦望
豈有常道遠濶音形邈若參與商因風附輕翼欲
語安能詳

次宿遷示馬殿聞張雲亭

幸有張平子還同馬少游不辭桑落酒共醉木蘭
舟虹捲荒城暮鷗鳴古樹秋生涯湖海慣搖落復
何憂

留別宋右之

津亭攜手故人情短筑高歌送我行猶望舌能存

辯士誰云頭可責，秦生城樓吹角千林暗。客舫揚帆一葉輕，此日盡君桑落酒。夢魂還繞鳳皇城。

懷友人遠戍

四首

詔許寬恩徙朔方，那堪國士鎖銀鐙。虎鬚校尉鞭車側，繡鬚將軍踞道旁。馬向千山關月白，雁飛萬里塞雲黃。龍興事業侔豐沛，弔古應悲舊戰場。

邊城日日聽鳴笳，極目辰韓道路賒。三襲貉裘猶未煖，一生雪窖便爲家。晨看軍府飛金鎬，暮向溪山引犢車。千載管寧傳阜帽，難從遼海問生涯。已甘罪譴戍荒谿，又發家人習鼓鼙。子孟博暫能隨。

老母子卿猶得見生妻鵲鴿原上聞猿嘯雞鹿山
前聽馬嘶夢裏依稀歸故國千重關隘眼終迷
十載西園載筆從于今慘戚苦無棕遂令文士虛
江左忍見諸公徙上庸患難誰能存李燮交遊無
計比何顥可憐逐客無消息盼絕金雞下九重

呈宋其武先生

一度桑乾水停車先叩門風塵重作客歲月久銜
恩雨到枯條潤春生黍谷溫金臺何處是郭隗至
今存

贈嚴覽民

孟冬十月鳴班馬萬堞蒼涼木葉下
檇李城邊日色西蕭然獨有悲歌者
悲歌若無人嚴安意氣真歛作鸞鳳
嘯結響凌高旻如君磊落天下士行
吟草澤何爲爾雁門騶騎謝不迎平
津鼎饌心所鄙以茲坎壈懷苦辛絮
裘席帽長如此向予自嘆比東方尚
羨侏儒奉一囊不然便作草玄手半
世還爲執戟郎噫嘻曼倩事漢武殿
門待詔揚華組懷昨猶能悅細君賜
金尚得逢公主嚴生爲爾重徘徊談
諧佚蕩非其材羽獵甘泉韞奇寶舍
人狗監無良媒讀書萬卷不得用壯
懷抑塞藏蒿萊登高

一長嘯四野陰雲開
天門蕩蕩無塵埃
酒酣拔劍心悠哉

贈沈子相

弱歲羞言蕭育交
揭來漫滅襴衡刺
海內悠悠誰見知
相逢謾說行藏事
憶昔逢君吳市門
余時挾策方童穉
同行年少有宋昌

謂宋
騎三

青絲繡帶遊聯

騎歡然一見朱顏舒
開襟輒復論心意
從此追驩十五年
中經喪亂誰能記
擊筑吹簫兩地人
鯉魚尺素頻勞寄
蒙茸未脫黑貂裘
聊客鴛湖挾蒯緱
登堂便索三日住
白飯青芻爲爾留
君今去聽華

亭鶴余亦伯通橋槩託臨印賢令誰繆恭護軍府
士終寥落願君莫慕五侯鯖且求百雉治專城墨
綬銅章殊不賤坐看到處有逢迎

公子行

陳確菴孝廉稱家兄字若公子行一篇造懷指事漆
漆可聽余未得讀也館舍閒暇聊作此擬之足徵哲

美滿
兄之益

翩翩佳公子容華耀朝暉門盛崔家戟家傳漢相
尊弟兄才調俱第一六龍八駿何足論哲昆射策
得高第少弟亦邀天子恩連鑣俱過上林苑縱轡
時經銅馬門銅馬門前鋪繡塢五侯七貴多交結
曾從複道入南宮還向建章過北闕歸來寒拂紫

貂裘銀燭金尊銷百憂美人燕趙迎歌館狎客新
豐上酒樓酒樓歌館迴波舞曲成便付梨園譜雁
柱銀箏樂未央鬢髻嬌容何嫵媚行觴佇立久徘徊
但願公子朱顏開乍聽金梁鶯語細還看珠履
雁行來雕輪華轂無時絕子雲筆札君卿舌迴騎
多過主簿家埽門要使監奴說坐中醉客轄偏投
堂上留髡燭已滅鸚鵡遙遙自隴西名花往往來
南粵鸚鵡名花何處藏前頭廣榭後雕房飛甍日
麗鴛鴦瓦繡戶香消翡翠牀寶融殿室自連亘馬
防觀閣生輝光甲第雲霞雄帝里田宅膏腴滿故

鄉故鄉佳麗一相憶桂楫蘭橈來往亟伐鼓南來
驛路迎揚舲直下通津塞甘寧錦纜棄不收鄂君
繡被歡無極玉津園內鳥欲啼伯通橋下人如織
更植烏桺金谷旁常穿曲沼芳林側據坐胡牀時
疾呼曲糲綠幘平頭奴張翰善賦周小史霍氏羣
知馮子都橫行詎畏洛陽令爭道還欺上大夫轉
日迴天真莫比自言富貴長如此未誦應璩百一
詩寧曉寬饒切諫語尚冠里中鴟亂鳴廷尉門前
雀棲止梁松得罪豈無因張讓弔喪非得已霆雷
倏忽下彤墀遠戍窮邊悔已遲東朝語不聞都尉

舊館人皆去，魏其白髮高堂猶議遣。斑衣愛子盡相隨，金闕迴看腸已斷。玉關生入夢，堪悲陂田苑。圓輸公府廝養髯奴，向北陞安國。灰然那可待，子卿無乳竟何時。從古豪華如轉燭，奔車覆轍看相續。海魚有日困泥沙，破巢之下無完族。吾慕李子堅身是，司徒兒變名入公府。不遣同舍知，吾慕袁夏甫。國相以爲父，謁吏不見通。却車更徒步，古人高蹤不可求。今人齷齪難爲謀，且漫垂鞭踏歌去。白雲無盡香山秋。

懷殿聞作

五首

弱冠思求友如君得幾人身窮知道合交淡更情
親悵別淞江樹停杯駕水春蕭齋相憶處得句步
檐新

繡州官舍好後圃植棠梨晝靜談經帳春寒久客
綈衝風迴燕雀殘雨截虹霓吾弟才方健休將鳳
字題

京華同作客日煖上林時紫陌追飛鞚紅樓狎艷
姬行藏季主卜得失塞翁知萬里南歸後飄蓬總
若斯

吾子白眉秀文章蒸曉霞能詩宗謝眺談史逼張

華捫蝨雄心在掀髯逸興賒相看成老大獲落歎生涯

嚴安曾上策沈炯向能文

謂覽民子相

窮巷常相過清言

近得聞南湖春漲水竹塢晚停雲酌醴當深夜高歌最憶君

婕妤曲

紈扇秋風棄何由見至尊金階原薄命玉輦敢忘恩
缺月明愁思飛花見淚痕妾身寧足惜爭奈啄皇孫

得舍弟書

憶汝方搖落何時歸敝廬三春飛獨雁五月到雙魚失伴親孤劍蠲愁得異書飄零余亦爾辛苦倚門間

舊都督某言邊事

先朝重邊疆間外將帥尊七萃屯漁陽萬馬嘶薊門一朝榆關破黯淡天雲昏百戰奔江南歎歎悲乾坤非敢忘報國身有刀劍痕

清明後一日逢上巳在史曉瞻署中作

元巳恰逢百五節南湖春色到官衙千家龍禁方敲火萬樹鶯啼盡放花獨有高風懷介子誰將往

事問張華却憐彈鋏長爲客徒倚樓頭送晚霞

送別金耳中

京華分袂即天涯此日相逢正落花彈鋏馮驩還
作客登樓王粲久辭家片帆淮浦行雲斷匹練吳
門落日斜攜手河梁重惜別驪駒一曲雜悲笳

懷漢槎在獄

吳郎才筆勝諸昆多難方知獄吏尊誰爲解驂存
國士可憐一飯困王孫蟬吟織室秋聲靜劍沒豐
城夜色昏聞道龍沙方議遣聖朝解網有新恩

重建烟雨樓紀事呈史曉瞻觀察

二首

使君持節駐名都攬轡行春入畫圖東海樓船風
浪息南湖簫管物華殊飛甍百尺看新榭廢壘千
年號舊吳自媿趨陪庾庾亮後馮高作賦獨踟躕

乍向高原辟草萊鴛鴦湖上夕陽開碑留五代錢
王字人說吳興沈約才千嶂空濛生氣象萬家烟
火入樓臺群公暇日同遊賞皂蓋朱轡太守來

許君

堯文爲
郡守

滇事

四首

黔公帶礪守蠻方列祖神靈徧越裳數代勲庸開
幕府一朝禍亂起蕭牆碧雞烈火連荒徼青犢強

兵向夜郎南服諸蠻都背叛中丞辛苦說勤王
帝子金輿嶺外春隴西宿將事艱辛會稽空保三
千卒海島寧存五百人閱武昆明追往代傷心天
寶有遺民孝陵守衛空山裏原廟何人薦白蘋
聞說朝廷遣六軍戈鋌諸詔久紛紜共看楊僕征
南節應有相如喻蜀文路出三巴棘道兩山通百
粵點蒼雲懸知檄下全滇日百戰還推元老勲
鉦鼓蠻天日氣昏老臣白首鐵衣存兩朝授鉞身
逾重十載專征位獨尊麾下爪牙多拜爵帳中心
膺盡承恩倚鞍儻聽素生笛回首當時淚暗吞

嘉興竹枝詞

九首

暇日南湖樂事多，賓僚酣宴醉顏酡。
風流太守行春至，手拍紅牙自案歌。

女陽亭畔采芙蓉，葦汭漁歌浥露濃。
漸向越山移客棹，土人依舊喚吳儂。

軍書飛下警嚴城，又選從軍橫海營。
一自元戎移鎮後，盡銷金甲事春耕。

吳越平分海氣收，錢王車帳此淹留。
祇今湖水深千尺，落日荒榛煙雨樓。

梵宇蒼涼背曲池，斜陽繫馬不禁思。
當年衣錦經

過處惟有松楸倚斷碑

宋翁子墓在東塔講寺

繡戶朱闌大道旁當壚女子解行觴
可憐別樣嬌顏色不學梁家隋馬粧

採桑陌上看名姝綠苑丹莢入畫圖
待得繭成春已去切教珍重繡羅襦

野外群鳬唼綠莎素衿飄蕩日衝波
兒童競逐方塘戲樂譜愁聞阿子歌

樂苑云芳輿人裴鸚鵡死作阿子歌

虛傳金鏤更銀塗朱火青煙乍有無
千古丁寧人已沒可能工似博山鑪

苦雨苔姚亦章史在晉

巖城廬井望難分祇爲重陰蔽日曛是處樓臺巢
水鶴終朝柱礎濕山雲千江潮急魚翻浪萬樹花
低鳥失羣異地士衡生百感彥先猶喜得相聞

史子唐廢圃

勝地傳金谷名園號辟疆編錢曾作埒壘石舊成
岡樓壯鴛鴦瓦門開蹴踘場綠墀臨曲水朱檻映
方塘別院絳歌管中流進羽觴美人脩曼態公子
冶遊裝玉盃分長樂珊鞭出建章珍禽棲繡戶嘉
木繞蘭房娛樂方無極繁華正未央豈知逢喪亂
忽復感滄桑乳燕巢新壘啼烏認女牆千尋無檜

柏十畝少篔簹畦水侵丹竈巖花亂石牀遶籬生
野蕨空館立沙棠徑礙蓬蒿長池殘菡萏香蝶飛
驚細網蟲篆徧長廊猶幸篋裘在還期堂構昌文
名馳赤幟才筆繼青箱適楚題鸚鵡遊燕解鸛鷀
邀賓聊命駕把酒已沾裳覽古遊非倦揮毫興欲
狂乍經東武館更慨石淙莊寥落窮愁者飄零俠
少行悲風隨擊筑落日送鳴榔岸帶千家晚橋通
八井荒天邊新柳綠城角暮雲黃

閏三月二日宋聿新招同陸昌生姚亦章

史編掌在晉暨穉弘叔遠子邁諸子小

飲

歲閏餘三已依然禊飲天華林重載輅曲水再張
筵城郭留菴謁江山倍潔鮮草經稊雨潤樹向暮
春妍煖日籠花氣輕風動柳煙嬌鶯歌宛轉乳燕
舞便翔村出招提境門當隴畝邊主人方倒屣客
子已停轡蔣詡今開徑揚雲夙草玄尊壘招逸士
冠蓋集群賢意氣消杯酒光芒動斗躔尚逾鄴下
會不數永和年蓴鱸供清饌鶯花叶雅絃角巾俱
笑傲珠履絕喧闐藉草茵仍滿流觴坐屢遷壯心
誰落拓羈旅獨迍邐人比崔亭伯經慚邊孝先未

爲守市卒尚索賃春錢何幸逢佳日
相從遊碧川
負書情既久納履意方虔
莫論升沈事終期湖海
緣飛虹隨返照歸鳥散平田
翠麥風逾煖朱華火
欲然吳鉤堪把贈楚舞自蹁躑
志士難迴日才人
貴解筌且看迎夏景
森木起鳴蟬

贈瞿曇谷

二首

相國孤忠誓佩環從君絕徼走間關
上書慷慨謀
三戶讀詔淒涼感百蠻
銅鼓草深煙瘴地珠江人
老戰爭間丹青祠廟今安在
剩有哀時庾子山
灌木東臯懶荷鋤一官微祿代耕畬
水連震澤殘

虹際山對金焦返照餘弟子探奇多載酒故人翦
燭止燔魚十年踪跡終成幻龜策奚勞問卜居

顏餐園招飲即事次韻

伊余三入洛潦倒敝裘初爲訪孫馮翊因逢顏秘
書禊堂開讌日藥圃灌花餘談笑揮珠玉君才我
不如

喜晤朱瑤岑用前韻

不見朱游久相逢雁到初殷勤筵上曲珍重袖中
書翠竹搖池影繁花放雨餘臨卬知敬客車騎羨
相如

亳州支園牡丹歌

秀才支維甫

譙城連延三萬戶北枕渦流跨城父省稼臺荒倚
夕陽朝真樓壞飛朝雨惟有魏城玄武門舟車絡
繹通商賈翠幙層樓夾道傍玉管銀箏盛歌舞支
公好鶴更耽奇古寺桐宮對別圃前庭沙棠後烏
桺洛陽名花不知數河堤三已禊堂開飛蓋千人
金澗來水晶之盤鸚鵡竿主人揖客相徘徊烟霧
環廻錦繡谷神仙襍還金銀臺恍如離宮三十六
美人帷幙無纖埃美人窈窕情何極吳脂越粉傾
城國神女高唐宋玉愁宓妃洛浦陳王憶乍見靈

芸鳳閣來復疑飛燕昭陽入皓腕朱顏自不同愁

眉墮髻慵無力晨從綺戶罷梳粧晚向鍼樓鬪顏

色分明明月舞霓裳彷彿鴛鴦機工夜織

已上俱花名

主人

向余太息久此地名花昔都有東自曹州西宋中

姚家爲王魏爲后當年世廟薛郎中議禮歸田植

數畝從孫鴻臚亦奇絕風流遠繼考功後百寶欄

前百樣裝樂譜龜茲不離手珊瑚木難珍重深首

葡萄葡萄萬里走都人車馬日紛紜須臾百六遭陽

九黃巾十萬下漳河青犢三千圍葛口金堤已決

孤城危豈有豪華鎮相守即看花榭久成塵曉事

花師三兩人十載中原息戰伐于今再見洛陽春
余聞此言奮袂起狂呼欲抵烏皮几花開花謝空
復情桑田碧海須臾爾掀髯絕倒爲君歌手持玉
觴朱顏酡乞君十幅蒲桃錦當筵樂事今如何赤
烏西走玉兔起錦屏春色將蹉跎年年渦岸花重
發好唱徐郎花下歌

贈黍邱陳簡菴

繁臺西望近一騎別陳遵努力千年事傷心兩地
人關河裘馬倦意氣酒杯親何日谿南路逢君試
問津

憺園文集卷第二

憺園文集卷第三

詩

虞浦集

中

北征口號

二十
四首

置酒旗亭畔風吹楊白花愁深同汲水道遠指京
華乍聽悲笳起回看落照斜庭闔千里夢憐我滯
天涯

兩弟分南北鵠原心事違穉圭方夜讀曼倩復朝
饑月向吳宮照雲依薊坂飛並憐梁苑客漂泊未
能歸

無端春草碧又見熟櫻桃候雁鄉心急征車客夢

勞風塵看漸老詞賦尚能豪且任鸛裘解狂吟醉
濁醪

繫馬朝真閣驅車鳴鹿城十年霜髯短三月客綈
輕多病資僮僕窮愁戀友生柯亭舊椽竹誰信作
龍鳴

汴水金堤險黃沙捲暮雲戈鋌終未息簞築不堪
聞萬井驚狐火千村散馬羣夷門衰艸畔酌酒信
陵墳

金輿帝子去朱戟故宮存麋鹿穿陵寢魚龍入殿
門連雲艮嶽迴落日大河奔老監曾驂乘淒涼說

舊恩

鐵騎方南下還從間道行
土人收橡食稚子挽牛耕
水涸橋梁壞雲開壁壘明
太行螺髻好偏向馬頭迎

朝歌康叔壤茅土百年開
往事愁南渡悲風向北來
雄圖空逝水浩劫已成灰
隆準侔高帝王孫劇可哀

淇園綠竹盡知爲築宣房
空寺茅簷在人家葵井荒
高邱封馬鬣頽岬壓魚梁
去去無勞望愁雲暮色黃

行指蕩陰澤遙思嵇侍中一泓水自碧千載血猶紅
玉座春吹雨靈旗夜起風英英岳忠武廟貌對城東

疲馬斜陽畔垂鞭過鄴城銅臺餘蘚碧漳水向人清
古戍花爭發沙堤柳自平相逢津吏傲誰許棄繻生

巖城跨趙魏蹙此卸征衣調馬兒童戲迎神村市圍
荷塘魚自亂麥壠雉還飛河北頻兵火如斯樂土稀

邯鄲臨古道睥睨立藂臺綠樹千家合紅塵百騎

來思尋毛遂客誰問左車才一聽悲歌者聊停逆
旅杯

壺城名勝地一望動嗟吁廢壠牛羊下荒煙雁鷺
呼少年還挾彈姹女罷當壚惟有回車巷人傳藺
大夫

真覺人間幻遽廬一枕中浮名隨野馬生事屬飄
蓬翠殿碑還古丹邱境本空朱輪燕趙客但此駐
遊驄

臨洛關外過初夏艸仍枯沙暗迷行騎城荒竄野
狐居人憂賊母客子畏萑苻却望邢臺近畿南即

坦途

程嬰存祀義豫讓報恩心此地昔人沒千年灋水
深花明開驛道苔老積碑陰我獨何爲者天涯寄
苦吟

真人三尺劍草昧試雄圖闕殿丹青古幽庭神鬼
趨山川仍沃衍風俗尚顓愚遺構傳新莽猶持威
斗無

韓信論兵處高壇細雨來燕因空壘住花傍戰場
開符節分途讓邊書換馬催閒來鉅鹿下弔古慙
徘徊

滹沱穿大陸恒岳拱巖疆三輔樓臺壯千軍組練
張芙蓉環郭水楊柳夾宮牆麥飯亭前路高歌意
渺茫

重關雞候曉煙草蚤行稀橋偃雙虹落洲橫一鷺
飛勢蟠天下脊地壯北門威瞻眺那居處諸山擁
翠微

故人訪上谷三載慰離思別久常懸榻情深在唱
驪尊壘孔北海驛騎鄭當時待爾遊燕市高吟易
水辭

過保定贈
陳藹公

豐沛諸豪傑君恩湯沐優犢車馳卒伍毳帳坐公

侯走馬探丸去調鷹帶檠遊近畿諸父老辛苦畏
莊頭

激灩金溝溢青葱玉樹寒幾迴思碣石三度向長
安入市碎琴易依人彈鋏難異鄉逢令弟宣髮共
驚看

金谷

河陽金谷澗澗水尚潺湲當年開宴處臺館不復
存緬想石衛尉聲勢何輝赫海岱置郵符荆揚來
賈舶蒼頭衣綺裘侍婢遺朱烏錦障爛如雲珊瑚
碎不惜造膝結賈謐望塵拜廣成富貴可長保詎

知禍患嬰多財信爲累三嘆涕淚橫至今歌舞地
蕭颯鵲鷗鳴吾聞伏波言貴者可復賤盈冲無定
端瞬息市朝變錢幣寧禍人物聚理必散寄言夸
毗子豪華非所羨

博興

我行適青齊秣馬博興城城門晝常閉亭午無人
行土室築道周云是錦秋亭昔時遊賞地零落存
兩楹潄澤荒蒲稗嚴冬結層冰狐狸竄荆棘鷓鴣
羣悲鳴入城問父老嘆息謂苦兵博興數十戶廬
舍悉已傾今茲二三載太守多橫征府帖昨夜下

搜括諸窮氓，睥目一吼怒。如聞號虎聲，苛政不一端。有土不得耕，縣令賢且惠。暨乃安其生，不然爲盜賊。死重名正輕，聽此策馬去。惻愴難爲情。

顏餐園席上詠朝鮮牡丹

二首

金谷朱甍二月天，栽成名種自朝鮮。愛看晴日低花圃，蚤向春風媚舞筵。紅荔千年馳粵尉，葡萄萬里使張騫。驪江絕域無人到，猶擬繁華天寶年。百寶欄前好試粧，主人愛賞爲停觴。花開想像經蓬島，葉底分明是洛陽。新樣舞衣宜窄袖，故宮樂譜案霓裳。姚黃魏紫今無數，却借鮫人海外裝。

虎跑寺和東坡壁間韻

策馬廻谿艾葉香
藕花著雨客衣涼
揭來山寺清
泉活望去江天
白練長金碧千巖傳
六代松杉十丈擁
諸方遙知刺史行
春至龍井茶烹好細嘗

和史立菴太史韻送洪暉吉之官程鄉

四首

海嶠朱輪動江汀
碧草生贈言良友意
叱馭使君行
水驛楓初落旗亭酒
斂傾休嗟五嶺遠
萬里亦

王程

梅州南極下去去
發征鞍廉石裝寧重
貪泉酌不難
山花當幙落海燕
傍人看見說鯨鯢
徙邊烽近

已安

撫字前賢重君行定若何峒丁輸稅急淵客織綃
多雀乳依童穉衙閒長薜蘿定尋高士宅枉駕過
巖阿

百里猶初政君才詎可量文章傳嶺嶠經術治蠻
方雨衰蕉花卷風翻荔子香三年看報績第一是
程鄉

鐵漢樓

崇岡如游龍蜿蜒蟠城頭飛甍插雲漢俯視萬井
收荒碑識歲月迺是鐵漢樓冠裳肅廟貌巖電炯

兩眸黯黯悲風來鬢髯頽靈旂緬昔元祐間白晝
鳴鵠鷗惟公殿上虎彈射無時休一旦荷嚴譴萬
里趨梅州倉皇進卮酒慷慨謀同舟投荒六年餘
寧爲瘴癘愁九死且不避于人復何尤我來一瞻
拜懷古心悠悠章蔡已安在汴河天外流

興寧道中懷暉吉

昔來未重陽觸暑陟遙巘戒途在深冬不知道路
遠災方物候遲寒花尚盈畹晨發踐微霜始悟歲
月晚彼美一跂予何當申嫵婉

姚敦長宗臣招同嚴築公黎傳人集西河

永福寺

嶺南氣候異冬煖猶絺綌旭日散昏霧深林無隕
城攬景增躊躇曳屣還蹢躅良友幸招邀欣然蠟
余屐凌晨昇籃輿逶迤出郊陌山色旣鬱紆湖光
漾深碧碑亭立中岫千年有遷客浮屠勢嵯峨去
天不盈尺古剎溯唐年風雨摧鼃鼃豐山在其陰
神鱣潛大澤艸堂坐微涼境曠心怡懌射覆復藏
鈎割鮮更行炙赤烏西南馳林壑脩已夕須臾散
綺筵君皇墮珠鳥爲歡常若斯奚爲怨行役

送別築公傳人北上因寄家書

歲暮猶爲客，那堪更別君。
灘聲章貢合，山色楚吳分。
嶺路餘殘雪，鄉心寄片雲。
京華逢我弟，應慙離羣。

容菴招往鎮平途次口占

四首

故人招我去，書到即登車。
離袂當秋杪，歸裝逼歲除。
懸知傾栢酒，聊復膾蒲魚。
宦況君真薄，官梅興有餘。

行行日已暮，始覺客衣單。
鳥道山泉滑，人煙瘴雨寒。
綠榕遮磴黑，烏栢著霜丹。
遙見村帘出，孤蹤此斲安。

野店寒燈滅，羈人夢不成。
護籬聞犬吠，候曙聽雞聲。
急瀑危崖響，疎星破屋明。
鄉園正迢遞，愁絕數歸程。

帶霧晨星沒，衝風獨戍愁。
野人貧餉黍，稚子暮驅牛。
水碓喧深崦，漁舟蕩急流。
漸看花縣近，聊爲解征裘。

秦君章民部出守惠州

粉署青綾放，早衙才名袞袞重。
秦嘉五湖舊擁仙，郎節百粵今行刺。
史車白鶴曉峰橫，翠靄朱明神洞挹。
丹霞寒惟是處光，風轉早晚珠還頌海涯。

李其拔園亭

勝友天涯贈縞初，停鞭借得浣花居。

余寓園亭

畫堂翡翠

翠依春，早小塢櫻桃綻雨餘。鄴下詞高賓從滿，河

陽花傍苑牆舒。

園近洪明府官舍

那堪便賦驪駒曲，夢想空

庭落日虛。

惠州西湖景賢祠分賦

二首

波光潋灩散晴煙，載酒還如被洛川。高閣嵯峨藏
佛剎，畫橋遠近出漁船。尊前白髮嗟遺老，座上烏
巾羨少年。獨有悲歌吳苑客，鄉心遙寄五湖邊。
十月清和嶺外天，當年逐客是神仙。峰頭鶴影窺

茶竈湖口尊絲綸釣船千載祠堂江樹老萬家閭
井海潮連西冷煙水渾相似撫景懷賢意惘然

惠杭

蘇長公遷謫地皆有西湖

寄胡沖之

五嶺秦時戍峇嶢獨揭陽燧煙迷鼓角瘴海暗帆
檣戰伐妖嬈出征輸蠶戶傷使君停節蓋好爲課
農桑

贈邱曙戒

淮水推人傑邱遲得令名金閨初釋褐鳳掖早遷
鶯御苑觀調馬中涓捧賜櫻主恩千載重官寮一

身輕卻畏羊腸險還愁鳥道行揚雄疲執戟嚴助
厭承明祖帳羣賢集鳴榔萬里征海霞簾外泊山
靄閣前迎柳子承仙蓋丹蕉拂使旌學書收柿葉
斷酒聽茶聲花發虞翻宅雲開陸賈城衣猶金殿
寵詩憶柏梁成定切涓埃報遙將葵藿領佩刀應
協兆藜火正含榮珍重酬知意殷勤軫舊情步檐
還北望脈脈斗杓橫

潮陽歲暮即事酬邵正菴并寄張青雷王
毓東

客子逢殘臘南荒匹馬來經冬霜雪少度嶺雁鴻

廻漲海懸旌動嚴城疊鼓哀虹光收浦漱蜃氣雜
樓臺橡樹傳遺愛豐碑辨劫灰山川餘落日祠廟
祇荒苔送客堤垂柳先春驛放梅浮生長落拓此
地重徘徊幸值金閨彥群推柱石才繫鞍方信宿
傾蓋得追陪政簡官衙靜情深綺席開黃柑分上
味綠蟻出新醅卓犖誇齊士風騷號楚材清歌聞
白雪連騎起黃埃投轄君偏厚歌驪我倦回韓江
真浩淼秦嶺自崔巍久客裘將敝流年景漸催明
朝臨北渚夢繞鳳城隈

贈宋潮州尚木

夙擅君宗望還傳翰墨芳騷人稱宋玉京北比田
郎初執明光戟曾合建禮香參軍從蔡節使者下
餘艤阮瑤詩無敵陳琳檄擅塲蛟宮春浪白越國
晚山蒼奏凱登祠部還旌讌柏梁三推咨典禮五
柝進詞章皂蓋花垂綬青門酒拍觴一麾經海甸
雙馭下潮陽水自馴鯨鱣山曾集鳳皇雲深連揭
嶺日出近扶桑卧閣征笳靜行車瘴雨涼伏波新
幕府橫海舊戎行轉餉紆軍旅籌時佐廟堂一邦
歌召杜此日見龔黃倒屣情何渥班荆話更長紅
亭過翠幃珠館舞霓裳爲戀陳遵轄難言陸賈裝

時窮宜抱璞臘盡欲鳴榔蠻驛千峰霧鄉心萬樹
霜銜杯增慷慨撫鋏慙飛揚深愧題鸚鵡無愁換
鷓鴣載歌巴里曲立馬復徬徨

潮州雜興

十六首

畫角聲殘白露團香消無夢到邯鄲篙師隔水遙
相語明日愁過蓬萊灘

三河雄鎮晚吹笳落日高樓送客槎別有鴛鴦七
十二紅粧多屬總戎家

幕府旌旗處處開還聞結客築金臺官家獨許籠
鹽鐵盡日高牙大舸來

曲隄臨江一徑通野牆綠竹自搖風邨人慣織龍
鬚草海外紅藤約略同

海雲障日自霏微郭外青山望去迷頃刻風波行
不得輕舟還泊蔡家圍

山勢崔嵬護鳳城漁陽精騎此屯營門前車馬休
輕過待取超哈記姓名

綺麗城南邸第開馬馳金埒起黃埃閭閻那復知
官府但說將軍勢若雷

侍郎亭起鱣溪邊陸相祠堂草色芊猶勝城中韓
廟裏健兒繫馬桄筵前

橋梁百尺似飛虹太守遺勲青史中誰向波濤增
厲禁月明估客歎征蓬

不向南荒譜異魚那知鬻實與車渠蘇公獨數江
瑤柱舉似黃魚恐不如

蠻女科頭兩足皴丈夫偏裹越羅巾無分晴雨穿
高屐江左風流憶晉人

榕樹陰沈覆古碑浮屠揭調唱新詞雙瞳如電驕
如戟名籍常誇繫八旗

近日朝廷詔語溫艤艫千里立降幡渾邪歸漢
勞征調戢直還思汲黯言

明月華燈官閣深主人張宴敵南金尊前聽慣蠻
姬曲忘却吳趨白苧音

百雉高懸落照邊千盤驛路出溫泉驪山宮樹今
零落猶賸荒溪沒草烟

五丁開鑿是何年邪許偏愁上水船兩岸蒼山餘
一線縱饒錦纜也難牽

秋夜集梁芝五宅同魏和公王震生高望
公湛用喈何不偕陳元孝程周量陶苦
子梁器圃分韻

縞帶名流客路逢清尊情與故園同共知努力千

秋後相對驚心兩鬢中白橘染霜看夜色碧鱸翻
雪憶秋風明朝便渡瀧頭水頻盼雙魚到渚宮

贈程周量

憶共衣露薊北霜蹉跎嶺表又重陽仙郎久擁青
綾被倦客猶慙白袷裝卷幔輕風吹薜荔推篷細
雨濕枕椰爲君命駕輕千里乘興先須倒百觴

疊前韻贈周量

海國樓臺月似霜千山紅葉過重陽懷人合命嵇
康駕作客真慙陸賈裝絳蠟清宵還擊鉢黃花別
路欲鳴榔諸君莫唱驪駒曲且醉筵前琥珀觴

荅周鶴田

瞥見雲龍奮筆端，知君千里駕青翰。
上書時已驚枋國，釋褐人還重士安。
高館張燈情自重，離亭折柳別應難。
從來湖海多豪氣，莫作尋常劒缺看。

芝五席上贈震生諸子三疊前韻

玉樹經秋半著霜，飄零人似鴈隨陽。
乍聽簞策疑邊調，祇取蒲葵當越裝。
海國新寒餘蛺蝶，瘴鄉初客試檳榔。
同心尚有西園侶，綺席爭飛曲水觴。

贈周量四疊前韻

鳳掖承恩近十霜，祇餘蓬徑對斜陽。
清尊自解金

貂換好句人將玳瑁裝暫對花明閒射覆却愁江
靜細鳴榔期君短簿祠前月共坐新秋引百觴

周量坐上口占贈六子

梁芝五

何處桂花發相從揚子居尊常傾白墮詩必擬黃
初說劒星芒動開軒夜色虛凌雲詞賦健誰擬薦
相如

王震生

此日牆東老當年曾棄繻黃金雄薊雪白字豔吳
趨射策千人廢承恩三殿殊何須追昔夢近已署

潛夫

魏和公

兩度遊南粵高歌和者稀
接羅常自倒步履便忘歸
鶴影排清漢松聲冷翠微
羅浮春信早香染薜蘿衣

陳元孝

曾羨金貂貴猶傳忠孝名
長鑣逢喪亂短褐足平生
蠅弔虞翻宅花愁陸賈城
辭君江水曲悽絕獨揚舲

高望公

伯鸞存古道結客重高生

梁鴻與高恢善
望公之五友也

畫擬長康絕

神看叔寶清煙霞疑痼疾豪傑寄深情浮拍逢君

夜銅籤報三更

陶苦子

金谷眞良會梁園續勝遊弟兄君最少羈旅我長
愁海燕參差舞珠江日夜流三車翻已徹天地總
浮鷗

廣州雜興

二十首

蝸牛滿壁對孤檠作客頻添故國情賞得一杯吳
市酒不知身在越王城

豐沛龍興受赤符，嶺南猶未入輿圖。由來旌節無人到，瘴海平開陸大夫。

海波幾度變滄桑，有客曾騎五色羊。日落風帆多賈舶，更誰鸞鶴此廻翔。

上卿持節過炎州，千騎風生海國秋。無地編錢堪作埽，却將戰艦載驂騑。

翠幕紅樓映日明，笙簫萬戶踏歌聲。太平街口車闐咽，疑是臯橋市上行。

樂譜龜茲天寶年，檀槽雁柱十三絃。鷓鴣忽聽南來曲，頭白何戡意惘然。

素鬣銀鱗舉網初，珠江九月進鮪魚。
却思擣薤燒鱸膾，心在江南煙水居。

狂風蹙浪舞天吳，絕島樓船費輓輸。
共道此鄉多寶玉，賺他泉客泣明珠。

臨汀明月坐魚磯，涼氣頻吹白袷衣。
南下循州踰鱷渚，重教葵扇向綃幃。

聞說南天道路難，送人含淚勸加餐。
無端漂泊身爲客，極目蛟宮海日寒。

遲牽錦纜度秋風，不見雕盤荔子紅。
賸有海南椰酒好，黃蕉綠柚玳筵中。

海珠寺前波似縠海幢寺裏月如銀吳綾十幅畱
題徧共識江東張舍人

故人來自朱崖郡才子歸從五柞宮同話城西移
日午隔鄰高士訪梁鴻

謂梁芝五也

蚌盤萋葉裏檳榔席上頻教伴舉觴更羨美人含
笑處櫻桃一顆破丹瓢

誰向昆池問劫灰越山高處越王臺只今絃管催
歌舞帳殿深沈朱邸開

破冢荒煙野草萋相傳此地葬嬰齊珠襦玉匣辭
黃土惟有鉤輅盡日啼

嶺外諸侯擁節旌牙旗畫卷陣雲高即看羽檄紛
如雨陶侃何須運甓勞

分明隋院玉鉤斜零落金鈿惜內家欲問離宮何
處是沈香浦上素馨花

張樂神人下絳霄百枝火樹又春宵踏燈女伴邀
明月梳得新妝墮馬嬌

蠻烟絕島故宮存颺母喧厓海氣昏曾憶白鷗飛
不去千秋義士哭厓門

癸卯除夕和佩公暉吉

裘馬偏驚歲盡時故人情重手頻持華堂客共圍

紅燭別苑花還繞綠池越酒盈觴心易醉吳飲當
席鬢成絲應憐萬里高堂上手撥寒灰有所思

甲辰元旦即事示暉吉

朱輪仙吏萬人看薄霧初分炬影寒曉曉鳥聲侵

爆竹芳菲樹色繞冰紈

元旦便服絳綵

更年尚鼓馮驩缺對

友須彈貢禹冠且盡屠蘇今日酒他鄉兄弟別離
難

初夏同洪暉吉明府張居玉孝廉李其拔
祠部飲侯定一園亭

客久苦無悰病起聊行樂暖日暖城闌條風散叢

薄彷彿暮春時花木紛綽約停車訪高士結廬背
北郭綠波漫方塘輕雲翳高閣續紛梅落英參差
竹含籜桃李旣敷榮桂花亦吐萼茂宰俄來遊門
前度略約主人芒屨迎嘉賓朱履錯列坐進山蔬
當軒陳羽爵陽禽轉樹杪欣然屏管籥談笑互縱
橫心神爲澡淪終宴豈知疲深交雜諧謔聊爲極
歡宴奚用嗟瓠落

程鄉人日看迎春

四首

嶺外逢人日明朝況立春寒梅飄白雪仙吏動朱
輪斗已從東指葭應出管新天涯芳草色風景滯

遊人

青帝迴蒼馭郊行攬物華舊儀今日覩盛事粵中
誇晴颺千隄柳風和一縣花還看賓佐集高譙酌
流霞

程鄉久廢迎春
自暉吉始舉

豫收門內鑰共覆掌中杯燕子宜春貼桃花隔歲
開樂隨官騎奏人逐土牛來父老占豐稔填街笑
語回

此際離家歎應同薛道衡思親頻入夢對酒不勝
情綵勝憐兒女辛盤憶弟兄寧知春律動猶聽粵
禽聲

贈暉吉

洪郎才調天下無，筆如風雨蛟龍趨。
名篇不數連城壁，好句還探罔象珠。
一旦排空上閭闔，仙人驂鶴期蓬壺。
天風瑟瑟吹下墮，直到東南碧海隅。
東南迢遞路無極，手版折腰辭不得。
騏驥還看困服箱，鸞鳳亦復棲叢棘。
我來匹馬過梅州，官閣清尊得暫留。
夜半酒酣作吳語，起舞勸君君莫愁。
陰那蒼崖連石洞，程江綠水縈花洲。
此中風土殊不惡，何必玉堂天上遊。

贈董佩公

董生身長八尺餘自稱越客笑魯儒折角朱雲誰
得比解頤匡鼎亦不如長句直欺唐大歷五言突
過魏黃初著書往往侔呂覽作賦還看敵子虛鑑
湖之水一何綠四明高山懸飛瀑青眼逢人倦不
開還因好友粵南來我交董生甫十日簞笠情親
膠在漆越鳥翻飛更北歸枕椰樹裏春蕭瑟

姚媒長送別江干却贈

此地情深者無如姚武功交緣傾蓋合貧畏舉尊
空離袂沾朝雨登車厭朔風合江如帶水常在兩
心中

懷國集卷三
媒長茅亭

二首

十里湖光疑罨畫，小橋通處有衡茅。
泉疏白石澆花圃，山露青松穩鶴巢。
荔子熟時多釀酒，蓴絲採得好充庖。
閒看魚鳥親人處，坐到斜陽挂樹梢。

媒長

釀荔酒佳

寤來蕉鹿悟全虛，祇合東臯學荷鋤。
沓嶂翠圍三畝宅，脩篁綠覆一牀書。
風吹小閣抽蘭葉，日落寒塘釣鯉魚。
輞口煙波渾不減，羨君帶郭有仙居。

梅州行寄暉言

梅州城帶春山蒼，春風滿陌桃花香。
客子思歸折

楊柳主人遠餞陳壺觴道傍觀者如垣堵揮淚登
車日過午疲馬蕭蕭經亂山陽禽百轉迎前浦舉
觴浮白畫燭張不覺更樓早撾鼓乍聽潮雞中夜
啼翻然遂覺別離苦明朝整轡過荒城亦聞小邑
絃歌聲茂宰乘輅入大府縣尉負弩前相迎官閣
華筵張待久綺食雕盤無不有蠻姬十六吳姬裝
強作歡娛進卮酒徒然供具累賢侯自顧頻年一
敝裘驛吏殷勤進雞黍濁醪不散羈人愁巔岼山
勢插天起幽咽泉聲百道流行行指是鴛鴦嶺詰
曲羊腸馬足梗樵父朝朝尋斧斤邨人往往攜笻

簪此邦賢令有侯芭官亭車過通街靜我家從父
典郡優咫尺龍山但引領平旦肩輿向水濬離離
白石溪粼粼野店經過才信宿地分東粵與江閩
誰云陸賈黃金好祇訝嵇含白髮新蒟醬來時瘴
雨暗鷓鴣啼處落花頻自下章江心轉急夢魂長
在老親側眼看桃李花亂飛猶喜還家及寒食梅
州使君應念予月明時見君顏色停撓書此寄故
人嶺雲江樹情何極

京口

孤舟曉發潤州城江上潮聲帶雨聲兩岸青螺看

似舊十年皂帽竟何成
清秋營壘連天起落日帆
檣向月平百粵還家一萬里
又愁朔雪薊門程

周量中輸入都重陽前一日遇于廣陵

蕭蕭疲馬過雷塘
却值征帆指帝鄉
惜別三春愁

五嶺

予春杪從嶺外歸

相逢兩度喜重陽

客歲訪周量及今廣陵相晤皆在重陽前後

月

懸古驛江潮落霜滿長隄
野草荒我自跨鞍君解纜
更期燕市共徜徉

高郵九日

乍別邗關聽戍笳
甌湖珠老浸寒沙
茫茫水國連天遠
淼淼征帆帶雨斜
蟹舍晚來多野市
菱絲颺

處盡人家壚頭沽取新醅飲何必銜杯對菊花

桃源

行過清淮古木稀朝朝霜氣透征衣瀕河城比荒
邨小夾岸帆如亂葉飛雁掠遙天寒雨散馬投空
棧夕陽微遺氓只訴徵求急早晚征南鐵騎歸

宿遷

槲葉從風滿路吹暮秋景色更淒其殘陽城角鍾
吾國細雨河邊項羽祠駐馬呼童沽濁酒下階攜
客覓殘碑浮雲西北連豐沛不盡英雄萬古思

崧嵒

嚴城金柝報三更僕御頻催逐伴行病擁重裘衝
夜色詩吟落月待雞聲亂山四面行雲出平野千
家帶犢耕書劒昔曾經此地綠苔侵徧舊題名

郊城道中

郊子遺封魯郡偏空臺猶遡問官年

城中有問官臺

國同鄒

費彈丸大人擬聃襄汗簡傳近郭晴嵐團曉市遠
山寒樹積秋煙舊遊苦憶張思曼斗酒殷勤驛路

邊

懷前令張懋脩

沂州

十日登程五日病指塗還未到徂徠月明沂水寒

裳涉雲遶蒙山策馬來紅柿飽霜當路熟黃花擎
露背人開江南秋晚多楓橘緩控青絲首重回

青駝寺

古寺停鞭日正東轉頭又見晚霞紅四圍高嶂連
青兗千里嚴飈下雁鴻邨店數家梨樹下野橋兩
岸荻花中喜逢阮籍還聯騎緩轡行吟興不窮

淮上

阮生
同行

新泰

縣城落落炊烟少野戍荒荒睥睨孤古碣獨尋羊
太傅遺風猶想范萊蕪萬山紅葉清霜下千騎黃

埃白日徂幾度遊燕憔悴客看雲立馬漫踟躕
梁莊曉起

寒夜迢迢露氣清中天月色最分明因驚倦寐訶
童起更急晨裝促伴行冷銚五更供豆屑殘燈獨
夜攪驢鳴遙知吾弟聽金鑰坐對青釭憶汝兄

羊流道中

驛路兼旬攪翠微風塵何處解征衣千株枯樹遮
官道一半斜陽帶野扉水落寒沙看馬渡草荒曲
磴遇人稀却思昨歲敲銅鼓江水青青鰕正肥

去年

九月過南海波羅廟

望岱

泰岱插天一萬仞秦皇漢武此攀躋禪壇晝靜白
雲出仙竈花深紅日低欲向危崖凌縹緲却愁倒
景斷虹霓吳門匹練三千里縱上丹梯眼亦迷

泰安道中

山城曉騎曙光催處處雕甍梵宇開碧澗蒼山千
徑轉縱金伐鼓萬人來過秋天氣疑初夏直北車
聲似殷雷乍喜晴和堪騁目漸看風急起黃埃

齊河送許吳二同年南歸至禹城二兄復來

荒城百雉亂鴉鳴寒樹千重古路平臨渡石梁收
返照背邨野戍插危旌思家歲暮書難寄送客天
涯酒易傾所幸交親還念我重回玉勒向神京

平原

多病難乘款段遊巾車此日得夷猶揮鞭塵起如
迴雪卷幔風來比泛舟青靄近通溟渤道黃河舊
斷萬津流萬津即九河之一今故道已塞茫茫百感誰能遣欲向平原
問督郵

德州懷史曉瞻大參

昔年曾爲故人來官閣梅花春未開鸚鵡賦成消

絳燭蒲萄酒熟瀉金杯江都宅畔題名在伏勝祠
邊攬轡迴五載自憐憔悴甚戟門重過漫徘徊

景州

排霄高塔勢峻嶒落日斜銜樹幾層種麥沙田方
待雪近隄河水已成冰高牙三輔寒吹角走馬千
群晚涼鷹此去滹沱連易水悲歌那得酒如澗

獻縣商家林哭同年黃愛九

寂莫金塘蕙艸枯故人三徑滿榛蕪可憐風雨埋
蒿里却憶鶯花別帝都橋似斷虹無過馬門餘
衰柳但啼烏那堪倦客遊京洛更過黃公舊酒壚

河間府

崇城鎖鑰壯神臯城外平沙但野蒿絳節趨程千里使雕弓遊獵五陵豪荒祠晚日聽悲筑土鏹寒燈對濁醪獨有翩翩王仲祖紫騮到處便揮毫

見王貽

上題句

雄縣

此地去天纔尺五計程三日到都亭霜華萬雉懸明月漁火千邨落曉星久厭風塵衣變素未消意氣眼難青漁陽草白沙如霧祇喜天邊慰鵲鴿

憂旱

我行齊魯間流民滿道路扶老更襁幼牽車載農
具出門心搖搖未知向何處夜宿投荒祠晝憩依
林樹苦言冬無雪春早麥苗仆安望屏翳來方罹
魃鬼怒斗米溢千錢縣官急征賦太行東復西萬
姓如涸鮒有時聞輕雷昂首待甘澍俄頃復開霽
火雲但迴互赤日疑流金黃沙似飛霧汲井覓遠
邨平陸皆古渡行人漸已稀墟落都非故頗聞北
來信濬渠方召募汶水不容舫濟河僅濡袴天府
運千艘束舵長淮住力作無還期室家安得顧何
如辭故鄉樂土暫保聚令甲嚴逃亡逡巡更恐懼

愁思當告誰嗟哉亦孔瘳我語勿歎息朝廷重生
聚遣官禱泰山旌麾數日駐宵旰正憂勤渙號在
旦暮膚寸不崇朝百川將灌注急還南畝間努力
事場圃

塗中即事

去秋適薊門嚴霜徧朔野歲宴經東蒙春條未盈
把今我更北征蟬鳴已盛夏夏雲愁行人憂來不
能寫半載燕吳間三走泰山下邨翁北陰簷隙笑予
款段馬津梁寧不疲爲是勞勞者

羊流邨二首

晨發觀徂徠前指汶陽道古樹多白楊穰陰雜梨
棗旁有馬鬣封殘碑縈蔓艸云是羊太傅先人此
營兆其北即故居遺址堪搜討昔云有王氣鑿之
猶三公佳城毋乃是歲遠誰能窮相墓知何代詳
是郭弘農孫鍾及陶侃往往遭仙翁魏晉多好事
謬悠將毋同羊公實名德勲烈邁前武孫皓指掌
中妙算契雄主鈴閣見輕裘漢津息鼙鼓論功比
鄼侯析爵裂萬戶自足致三公詎假一抔土立馬
重徘徊緬然獨懷古

羊公生民秀母出蔡中郎承家實華國韞德乃發

祥千年藏舟處杓榆蔽夕陽昔聞峴山讌撫景淚
沾裳矧茲邱壟樹魂魄應難忘庶幾襄陽碑與之
同久長

交河

古驛枕交河亭午駐征騎鷄冠一老人駕車向夕
至鬢髮疑繁霜赭顏似深醉自言善養生百齡已
過二武夷本故山嶧陽久棲寄秉燭猶作書戴星
自總轡健飯過壯夫嬉戲狎童穉頗得君平傳兼
述開元事獨有金丹訣叩之輒深秘伊予蒲柳姿
盛年已顛顛擊劒學不成獻賦名未遂安得從君

遊脫落自茲始

雄縣即事 二首

洞庭熟盧橘吳淞多鱸魚客心引歸夢倏然經敞
廬鐸聲驚中夜土鏹殘燈餘呼童還秣馬逐伴乃
升車城頭吹細雨稍喜塵氛除流水夾官路垂楊
挽客裾舉網得魴鯉沿波攬芙蕖鄉關亮不異暫
令心意舒

紫騮何蹀躞軒車何連翩朝辭建章裏暮宿都城
邊侍臣在省闥冠蓋稱神仙聖朝無闕失暫遣歸
園還鄉固赫奕謁帝需歲年遂令高梧鳳坐成

寒樹蟬君看青雲侶滯留今尚然

涿州

軒轅苦戰處白日生黃埃千里桑乾水滔滔不復
回長安日邊近宮闕鬱崔嵬橋危虹欲斷將涉還
徘徊安得道如砥躡步黃金臺

同李元仗汪茗文葉子吉舍弟公肅餞送

董玉虬侍御即事

三首

粲粲蘭臺英結宇臨芳甸飛閣何峻嶒平疇自葱
蒨奉使將遠行供張羅清醺蕭散無俗情徘徊戀
親串坐聽秋蟬鳴仰觀夏雲變明發辭郊坰有懷

誰能遣

階前赭白馬遠道逝駸駸障泥耀罽繡羈勒飾黃金
長鳴辭櫪下遂懷萬里心前途指虞坂昂首涉
嶇嶇東歷洛陽陌西經太華陰馳驅亮不惜君恩
難可任

赤烏迫崦嵫林表纖月明鷗絃忽然歇四座皆含
情高樓奏新曲宛轉淒以清願爲西流景馳光隨
旆旌旆旌不可及延佇徒屏營歲周庶旋反寶瑟
將塵生

瞻園文集卷第三